

Fasnacht 2003



J. B.-CLIQUE SANTIHANS
Alti Garde

Deggterlis

„Herr Doggter, Herr Doggter“ brielt der Meier
ich ha immerno Drugg uff den Eier;
und s Myyneli im Zimmer nääbedra,
bläärt: „wenn kemme myyni Nierestai draa“?

Aber kai Doggter losst sich do lo bligge,
die dien drumm grad iiri Fääler fligge,
e riise Buff herscht bi uns im Spittel,
si kemme halt kuum druss, die im wysse Kittel.

Der Conti in syner grischtlige Rue,
luegt dämm Schlamassel unschiniert zue,
Är het drum kai Stutz mee, ka nimmi blaane,
drumm gheert jetze e globaali Leesig aane.

Die schwyzer Äärzt, sisch halt eso,
dien sau lang an der Uni ummestoo,
wänn dernoo, me kas kuum verstoo,
nullkommabletzlig e riise Zapfe iiberkoo.

Derby isch der Spittel ISO 9000 zertifiziert,
me kennti drumm, ganz unschiniert,
die dyyre Hiirsche in d Wieschti hetze,
und mit Zääsantymkorifäae ersetze.

Velicht däät me deert in China hinde,
none Hampfle Baarfuessäärzt finde,
oder lueget emool d Asylanten aa,
ob me nit der aint und ander bruuche kaa.

Isch aine Metzger oder Schbängler-Sanidäär,
Yysebieger, Schnyyder, Drämmmer, Segredäär;
baarlierd amänd aine e baar Brogge Ladyynisch,
nit pherfäggt, slänggt, wenn's nur zem Schyyn isch.

Oder findsch e soone sälte Wääse,
wo ooni z kotze der Sunntigsbligge ka lääse,
denn schigg si schnäll bim Conti verbyy,
es kennte unseri näggschte Deggter syy.

Als Gnocheschlosser oder by der Narkoose,
zem gebääre oder schpiele vo Darm und Bloose,
an der Häärzlung-Maschiine, am E Ka Gee,
kasch uf aismool so dabbigi Leerbuebe gsee.

Die hänn e Medizinschungge studiert,
mitere Granggeschwester e weeneli karrisiert,
d Anatomii bsuecht, wäärend der Museumsnacht,
und dernoo bim Jack the Ripper e Doggteraarbed gmacht.

Si biffle au d Bryysdabälle vo de Granggekassee,
dermit si joo wisse, wo me ka der Stutz go fasse,
dernoo mien sii none baar falschi Diploom kopiere,
und scho duet sii der Conti engagiere.

Die lätze Deggter dien dichtig therapiere,
Blessuure blätze, in der Neurology psychiatriere,
Guurgeli kontrolliere, Brischt massiere,
oder au d Fraue zem e Hepperli verfiere.

Binere Alte Garde, der Daifel hets welle,
kasch nit immer uff alli zelle,
wenn mir wänn uffe Cortège goo,
isch meeglig ass epper nit duet koo.

Wel der aint sich nimmi rächt ka bugge,
wägeme wieschte Ryymatys im Ruge,
en andere bruucht dringend e neye Huftgnoche
und der Zeedelschryber het e Finger broche.

Velicht sotte mir soone lätze wälsche Doggter kaufe,
äär wuordi denn im Voordraab mit uns laufe,
kennt uns alli umsoorge und dichtig uffbäbbele,
ass mer d Wettstaibrugg kennte uffeszue däbbele.

Äär wäri by uns beschtens uffghoobe,
miest sich au anderwittig nit ummeblooge,
denn mir soorge sälber firs Bloose und Bepperle,
und bruuchtenen au nit firs Hepperle.

* * * * *